

U skladu sa članovima 24. i 48. kao i drugim relevantnim odredbama Statuta Asocijacije kompozitora – muzičkih stvaralaca (u nastavku: „Udruženje“) i drugim relevantnim pozitivnim pravnim pravilima prije svega Zakona o autorskom i srodnim pravima (Sl. glasnik BiH br. 63/10) (u nastavku: „ZAISP“) i Zakona o kolektivnom ostvarivanju autorskog i srodnih prava (Sl. glasnik BiH br. 63/10) (u nastavku: „ZKOAISP“), uvažavajući i uzimajući u obzir međunarodna i općeprihvaćena pravila, standarde i principe kolektivnog ostvarivanja autorskih prava vezane za revidiranje članstva u kolektivnim organizacijama, posebno kolektivnim organizacijama sa velikim brojem članova, uzimajući u obzir činjenicu da Udruženje ima iznimno veliki broj članova i da je primjetna i poželjna tendencija rasta broja članova u budućnosti, a što sve može dovesti do propusta po pitanju zadovoljenja svih uslova za članstvo od strane svih osoba koje su pristupile redovnom članstvu Udruženja, odnosno kako postoji realna mogućnost da kod velikog broja članova svaki član u vrijeme pristupanja ili naknadno, odnosno više, ne zadovoljava sve elemente kvalifikovanosti za redovno članstvo u Udruženju, a kako Udruženje ima zakonsku, pravnu, moralnu, fiducijarnu i obaveze po drugim primjenjivim osnovama da osigura integritet članstva u Udruženju kao i da je svaki redovni član zaista i potpuno kvalifikovan da bude redovni član Udruženja, Skupština Udruženja, na sjednici održanoj 18.06.2020. godine usvaja sljedeći:

## **P R A V I L N I K**

### **o postupku revizije redovnog članstva**

### **Asocijacije kompozitora – muzičkih stvaralaca**

#### **Član 1.**

- (1) Ovim pravilnikom se uređuje postupak provjeravanja da li svaka osoba koja je redovni član Udruženja zadovoljava sve zakonske i statutarne uslove za redovno članstvo u Udruženju odnosno da li je svaki redovni član Udruženja u bilo kom trenutku u potpunosti kvalifikovan da bude redovan član Udruženja prema svim relevantnim primjenjivim zakonskim, statutarnim i drugim relevantnim pravnim pravilima. Ovaj postupak u objektivnom i u subjektivnom smislu se u ovom pravilniku naziva revizijom redovnog članstva Udruženja.
- (2) Nijedna odredba ovog pravilnika ne uspostavlja novi ili dodatni uslov za redovno članstvo u Udruženju. Ovim pravilnikom se uređuje da li individualni redovni članovi zadovoljavaju postojeće i relevantne uslove za redovno članstvo definisane drugim primjerenim pravnim izvorima, prvenstveno primjenjivim zakonima i Statutom Udruženja. U slučaju bilo kakvog sukoba bilo koje odredbe ovog pravilnika sa bilo kojom zakonskom odredbom ili odredbom Statuta Udruženja prednost uvijek ima odredba zakona odnosno Statuta Udruženja.
- (3) U ovom pravilniku pojam „redovni“ član se koristi sa značenjem koje je ovom pojmu dao Statut Udruženja.
- (4) Ovim pravilnikom se ne uređuje postupak revizije počasnih članova Udruženja ili eventualnih drugih vrsta članova Udruženja, ako budu u budućnosti postojali, osim ako drugačije izričito ne bude određeno.
- (5) Obaveze koje eventualno nastaju za redovne članove iz ovog pravilnika te djelovanja Radnog tijela za reviziju članstva Udruženja, Stručne službe Udruženja, Upravnog odbora Udruženja i drugih organa i djelatnika Udruženja u provođenju postupka revizije redovnog članstva Udruženja ne predstavljaju nove obaveze već predstavljaju konkretizaciju obaveza koje redovni članovi Udruženja imaju prema odredbama Statuta Udruženja, posebno člana 15. Statuta Udruženja, ugovora koji su zaključili sa Udruženjem kao i sukladno relevantnim primjenjivim pravnim normama te obavezama koje imaju razumno se smatrati da proizilaze iz redovnog članstva u Udruženju.
- (6) Korištenje imenice/zamjenice ili druge vrste riječi koja označava jedan pol neophodno podrazumijeva i bezizostavno uključuje sve polove i jednako se primjenjuje na sve jedinke bez diskriminacije na osnovu pola, rase, vjere, etniciteta, političke pripadnosti ili bilo koje druge osnove.

#### **Član 2.**

- (1) Postupak revizije redovnog članstva Udruženja, u saradnji sa Stručnom službom Udruženja, Generalnim direktorom Stručne službe Udruženja, Sekretarom Udruženja, drugim djelatnicima i organima te radnim tijelima Udruženja a sve pod nadzorom i saradnjom Upravnog odbora Udruženja i Nadzornog odbora Udruženja, provodi Radno tijelo za reviziju članstva Udruženja (u nastavku: „Radno tijelo“).
- (2) Upravni odbor Udruženja će odlukom uspostaviti Radno tijelo za reviziju članstva Udruženja.

- (3) Odlukom o osnivanju i/ili drugim odlukama Upravni odbor Udruženja će definisati nadležnost i ovlaštenja Radnog tijela, sastav članstva, izbor i mandat te postupak nadzora i smjene članova Radnog tijela, pored ovlaštenja i nadležnosti koje za radno tijelo proizilaze iz ovog i drugih akata Udruženja, te će Upravni odbor samostalno urediti po potrebi ili odrediti da će Radno tijelo urediti druga pitanja vezana za egzistenciju i djelovanje Radnog tijela u okviru Udruženja.
- (4) Članove Radnog tijela bira i razrješava Upravni odbor Udruženja sukladno odluci o osnivanju i drugim primjenjivim odlukama koje uređuju ovo pitanje.
- (5) Članstvo u Radnom tijelu je slobodno. Član Radnog tijela može slobodno da istupi iz Radnog tijela u bilo kojem trenutku.
- (6) Samo redovni član Udruženja može biti izabran za člana Radnog tijela.
- (7) Prilikom izbora članova Radnog tijela Upravni odbor će obratiti pažnju da izabere renomirane članove Udruženja sa dokazanim muzičkim stvaralaštvom, reputacijom i ugledom među drugim članovima i kvalitetama koje odgovaraju nadležnosti i ovlastima Radnog tijela.
- (8) Radnom tijelu mogu biti dodjeljena i druga ovlaštenja kao i nadležnosti pored nadležnosti i odluka Upravnog odobora iz prethodnog stava te iz ovog pravilnika Statutom Udruženja, pravilnicima i drugim aktima Udruženja, odlukama drugih organa Udruženja te može dobiti nadležnosti i ovlaštenja iz drugih primjerenih pravnih izvora, pod uslovom da su takve nadležnosti i ovlaštenja vezana za reviziju članstva kao i za postupak pristupanja redovnom članstvu i provjeravanje elemenata vezanih za kvalifikovanost za redovno članstvo Udruženja. Posebna pažnja će se obratiti da nadležnosti i ovlaštenja koja se dodjeljuju Radnom tijelu budu kompatibilna sa dignitetom, integritetom, nepristrasnosti i drugim visokim kvalitetima Radnog tijela kao cjeline i individualnih članova Radnog tijela.
- (9) Radno tijelo će, po potrebi, donijeti posebne propise i pravilnike te druge akte vezane za djelovanje u svojoj nadležnosti i ovlaštenjima.
- (10) Sekretar Udruženja i Stručna služba Udruženja imaju obavezu da pružaju administrativnu i svaku drugu pomoć Radnom tijelu Udruženja u postupku revizije redovnog članstva Udruženja kao i da izvršavaju naloge Radnog tijela vezane za postupak revizije redovnog članstva Udruženja i za djelovanja Radnog tijela sukladno ovom pravilniku i u nadležnosti Radnog tijela.
- (11) Radno tijelo može izvoditi i prikupljati te tražiti da se dostave dokazi, pozivati članove na izjašnjenja bilo pisanim ili usmenim putem na sjednicama Radnog tijela, tražiti stručna mišljenja i pojašnjenja od članova, djelatnika i organa Udruženja i trećih lica, slati dopise i na drugi primjeren način djelovati u okviru postupka revizije redovnog članstva Udruženja u granicama svog ovlaštenja i nadležnosti.
- (12) Članovi Radnog tijela, pod uslovom da djeluju sukladno stavu koji slijedi nakon ovog stava a posebno da su individualno potpisali ugovor iz stava koji slijedi, imaju pravo da izvrše uvid u spise te da im se omogući pristup privatnim i ličnim podacima redovnih članova Udruženja ukoliko je i u obimu u kom je to potrebno da bi izvršavali postupak revizije redovnog članstva Udruženja.
- (13) Svaki individualni član Radnog tijela kao i Radno tijelo kao kolektiv imaju obavezu da čuvaju sve podatke povodom kojih im je omogućen uvid vršeći postupak revizije članstva kao poslovnu tajnu u skladu sa relevantnim pravilnikom Udruženja koji uređuje pitanje poslovne tajne i postupanja povodom poslovne tajne Udruženja. Udruženje će zaključiti poseban ugovor kojim će urediti obavezu čuvanja privatnih i ličnih podataka redovnih članova Udruženja tajnim sa svakim individualnim članom Udruženja. Ukoliko nije ugovorom drugačije određeno svaki individualni član Radnog tijela mora čuvati podatke koje sazna vršeći postupak revizije redovnog članstva tajnim najmanje 10 (deset) godina nakon prestanka članstva u Radnom tijelu a ako priroda podataka to zahtjeva, bez vremenskog ograničenja.
- (14) Radno tijelo ima obavezu da postupak revizije redovnog članstva Udruženja vrši nepristrasno.
- (15) Radno tijelo je u okviru svoje nadležnosti i ovlaštenja nezavisno. Ni jedan drugi organ Udruženja ne može narediti Radnom tijelu kako da donese odluku povodom bilo koje individualne revizije redovnog člana Udruženja. Upravni odbor Udruženja, Nadzorni odbor Udruženja i Skupština Udruženja vrše nadzor nad djelovanjem Radnog tijela ali ne mogu nalagati donošenje konkretnih odluka od strane Radnog tijela. Članovi Radnog tijela mogu za svoje djelovanje civilno, prekršajno, krivično i na drugi način odgovarati sukladno relevantnim pozitivnim pravnim pravilima.
- (16) Radno tijelo podnosi barem jednom godišnje pisani izvještaj o svom radu Skupštini Udruženja.
- (17) Radno tijelo, ukoliko utvrdi da individualni redovni član Udruženja ne zadovoljava jedno ili više zakonskih ili statutarnih uslova za redovno članstvo u Udruženju odnosno ukoliko utvrde da bilo koji pojedini redovni član Udruženja po bilo kojoj relevantnoj osnovi nije bio ili nije više kvalifikovan za redovno članstvo Udruženja neće i ne može da isključi iz redovnog članstva člana Udruženja u pitanju. Radno tijelo će o svom

nalazu pisano obavijestiti Upravni odbor i/ili Skupštinu Udruženja koji će dalje postupiti u skladu sa relevantnim zakonskim odredbama i Statutom Udruženja u okviru svojih nadležnosti i prema relevantnim odredbama prvenstveno ugovornog odnosno obligacionog prava.

(18) Radno tijelo izvještava o rezultatima svog djelovanja Upravni odbor Udruženja, Nadzorni odbor Udruženja, Skupštinu Udruženja i druge organe kao i tijela po potrebi i prema relevantnim-pravnim pravilima, a najmanje jednom godišnje.

### Član 3.

(1) Postupak revizije redovnog članstva se vrši permanentno i perzistentno, dok Skupština ili Upravni odbor Udruženja u okviru svojih nadležnosti ne obustavi postupak revizije redovnog članstva primjerenom odlukom, ili do prestanka pravne egzistencije Udruženja.

(2) Svaki redovni član Udruženja može biti predmetom individualnog postupka revizije redovnog članstva tog člana. Niti jedan redovni član Udruženja nije izuzet od primjene na tog redovnog člana individualnog postupka revizije redovnog članstva odnosno od primjene odredbi ovog Pravilnika.

(3) Svaki individualni redovni član Udruženja ima pravo i obavezu da postupi po nalogu Radnog tijela za reviziju članstva Udruženja koja proizilazi iz obaveza redovnog plana prema Statutu Udruženja, prema ugovoru koji je redovni član Udruženja potpisao sa Udruženjem, prema relevantnim pravnim pravilima i prema obavezama koje prirodno razumno proizilaze iz članstva u Udruženju.

(4) Radno tijelo za reviziju redovnog članstva Udruženja može izvršiti individualnu reviziju redovnog članstva svakog individualnog redovnog člana neograničen broj puta, svaki put kada za to bude Radno tijelo imalo validan razlog.

(5) Radno tijelo ima obavezu da prava i dužnosti u okviru svojih nadležnosti i ovlaštenja vrši savjesno, odgovorno, profesionalno, principijelno, sa dignitetom i dosljednosti, te ima obavezu da konstantno vodi pažnju da se postupkom revizije redovnog članstva što manje opterećuje individualni redovni član Udruženja.

(6) Radno tijelo kao kolektiv ima obavezu da spriječi zloupotrebu postupka revizije redovnog članstva od strane drugih organa Udruženja, od strane drugih članova, od strane individualnih članova Radnog tijela i na druge načine.

(7) Bilo koji redovni član Udruženja može uložiti žalbu na odluke ili bilo koji aspekt djelovanja Radnog tijela Upravnom odboru Udruženja.

### Član 4.

(1) Radno tijelo za reviziju članstva Udruženja ima pravo i obavezu da utvrdi da svaki redovni član Udruženja koji je fizička osoba koja je pristupila redovnom članstvu Udruženja na osnovu činjenice i koja tvrdi da je državljanin Bosne i Hercegovine ima valjano i validno dokazano državljanstvo Bosne i Hercegovine.

(2) Radno tijelo će utvrditi činjenicu iz prvog stava ovog člana tako što će provjeriti da li je svaki redovni član Udruženja koji je fizička osoba koja tvrdi da je državljanin BiH, dostavila valjan i validan dokaz o državljanstvu BiH sukladno pravilniku kojim se uređuje postupak pristupanja redovnom članstvu Udruženja odnosno da li dostavljeni dokaz državljanstva BiH je bio i da li je još uvijek valjan i validan.

(3) Za svakog redovnog člana Udruženja koji nije valjano i validno dokazao državljanstvo BiH sukladno relevantnom pravilniku a imao je obavezu usljed činjenice da je to jedna od činjenica na osnovu kojih je ta osoba pristupila redovnom članstvu Udruženja, Radno tijelo će obavijestiti osobu u pitanju i tražiti da ta osoba, u razumnom vremenskom intervalu ne kraćem od 7 a ne dužem od 30 dana, dostavi valjan i validan dokaz o državljanstvu BiH sukladno relevantnom pravilniku.

(4) Radno tijelo će postupiti kao u stavu 3. ovog člana ukoliko dostavljeni dokaz državljanstva BiH je iz bilo kog razloga prestao biti valjan ili je utvrđen da nije bio valjan kada je dostavljen Udruženju po bilo kojoj osnovi.

(5) Radno tijelo će postupiti kao u stavu 3. ovog člana ukoliko postoje, po bilo kojoj, osnovi opravdana sumnja u državljanstvo BiH redovnog člana u pitanju ili ako druga osoba predoči Radnom tijelu dokaze kojim se državljanstvo BiH fizičke osobe u pitanju dovodi u pitanje ili ako Radno tijelo sazna po bilo kojoj osnovi i na bilo koji način nešto što stavlja u pitanje državljanstvo BiH osobe u pitanju.

(6) Redovni član Udruženja koji dobije dopis od Radnog tijela u kom se traži dostavljanje dokaza o državljanstvu BiH ima obavezu iz članstva u Udruženju kao što je prethodno obrazloženo i uređeno ovim pravilnikom da postupi po nalogu Radnog tijela.

(7) Radno tijelo će obavijestiti Upravni odbor Udruženja o svakom redovnom članu koji u nevedenom roku nije dostavio valjan i validan dokaz o državljanstvu BiH a imao je obavezu to da učini, odnosno koji je

dostavio dokaz koji nije validan i/ili valjan niti je opravdao svoje nedostavljanje ili dostavljanje nevalidnog i nevaljalog dokaza, na dalje postupanje od strane Upravnog odbora Udruženja.

#### Član 5.

- (1) Radno tijelo za reviziju članstva Udruženja ima pravo i obavezu da utvrdi da svaki redovni član Udruženja koji je fizička osoba koja je pristupila redovnom članstvu Udruženja na osnovu činjenice i koja tvrdi da iako nije državljanin Bosne i Hercegovine da je toj osobi nadležni državni organ BiH na pravno valjan način odobrio stalni boravak u Bosni i Hercegovini ima valjanu i validnu dozvolu i/ili odobrenje za stalni boravak u BiH.
- (2) Radno tijelo će utvrditi činjenicu iz prvog stava ovog člana tako što će provjeriti da li svaki redovni član Udruženja koji je fizička osoba koja nije državljanin BiH ali kojoj osobi je nadležni državni organ BiH na pravno valjan način odobrio stalni boravak u Bosni i Hercegovini dostavila valjan i validan dokaz kojim se utvrđuje da je toj osobi nadležan organ BiH odobrio stalni boravak u Bosni i Hercegovini sukladno pravilniku kojim se uređuje postupak pristupanja redovnom članstvu Udruženja, da li je dostavljeni dokaz valjan i validan te da li je odobrenje koje ta osoba ima od strane nadležnog državnog organa BiH za stalni boravak još uvijek na snazi i pravno valjan.
- (3) Za svakog redovnog člana Udruženja koji nije državljanin BiH ali koji nije validno i valjano dokazao da ima odobren stalni boravak u Bosni i Hercegovini od strane nadležnog državnog organa BiH a imao je obavezu usljed činjenice da je to jedna od činjenica na osnovu kojih je ta osoba pristupila redovnom članstvu Udruženja, koji je dostavio nevaljan i/ili nevalidan dokaz odnosno kojoj osobi je odobrenje za stalni boravak u BiH od nadležnog državnog organa BiH iz bilo kog razloga i po bilo kojoj osnovi prestao odnosno više nije na pravnoj snazi, Radno tijelo će obavijestiti osobu u pitanju i tražiti da ta osoba, u razumnom vremenskom intervalu ne kraćem od 7 a ne dužem od 30 dana, dostavi valjan i validan dokaz o odobrenosti stalnog boravka u Bosni i Hercegovini od strane nadležnog državnog organa BiH za tu osobu.
- (4) Radno tijelo će postupiti kao u stavu 3. ovog člana ukoliko dostavljeni dokaz je iz bilo kog razloga prestao biti valjan ili je utvrđen da nije bio valjan kada je dostavljen po bilo kojoj osnovi.
- (5) Radno tijelo će na isti način postupiti ukoliko postoje po bilo kojoj osnovi opravdana sumnja u dozvoljenost stalnog boravka u Bosni i Hercegovini za redovnog člana u pitanju, ili ako druga osoba predoči Radnom tijelu dokaze kojim se dozvola za stalni boravak fizičke osobe u BiH u pitanju dovodi u pitanje ili ako Radno tijelo sazna po bilo kojoj osnovi i na bilo koji način nešto što stavlja u pitanje dozvolu za stalni boravak u BiH osobe u pitanju.
- (6) Redovni član Udruženja koji dobije dopis od Radnog tijela u kom se traži dostavljanje dokaza o dozvoljenosti stalnog boravka u BiH ima obavezu iz članstva u Udruženju kao što je prethodno obrazloženo i uređeno ovim pravilnikom da postupi po nalogu Radnog tijela.
- (7) Radno tijelo će obavijestiti Upravni odbor Udruženja o svakom redovnom članu koji u ostavljenom roku nije dostavio valjan i validan dokaz o dozvoljenosti stalnog boravka u BiH a imao je obavezu to da učini niti je opravdao svoje nedostavljanje, na dalje postupanje od strane Upravnog odbora Udruženja.

#### Član 6.

- (1) Radno tijelo za reviziju članstva Udruženja ima pravo i obavezu da utvrdi da svaki redovni član Udruženja koji je pravna osoba koja je pristupila redovnom članstvu Udruženja na osnovu činjenice i koja tvrdi da je nosiocem autorskog prava povodom barem jednog autorskog muzičkog djela i da je registrovana u Bosni i Hercegovini je dostavila dokaz da je nosiocem autorskog prava povodom barem jednog autorskog muzičkog djela i da je registrovana u BiH, da dostavljeni dokaz je validan i valjan te da postoje relevantne činjenice u trenutku revizije članstva.
- (2) Radno tijelo će utvrditi činjenice iz prvog stava ovog člana tako što će provjeriti da li svaki redovni član Udruženja koji je pravna osoba je dostavila validan i valjan dokaz da je nosiocem autorskog prava povodom barem jednog autorskog muzičkog djela i da je registrovana u Bosni i Hercegovini sukladno pravilniku kojim se uređuje postupak pristupanja redovnom članstvu Udruženja i pravilniku kojim se uređuje postupak prijavljivanja autorskih muzičkih djela Udruženju.
- (3) Za svakog redovnog člana Udruženja koji je pravno lice koji nije validno i valjano dokazao ili da je nosiocem autorskog prava povodom barem jednog autorskog muzičkog djela ili da je registrovan u Bosni i Hercegovini ili obje činjenice zajedno, a imao je obavezu usljed činjenice da je to skup činjenica na osnovu kojih je ta osoba pristupila redovnom članstvu Udruženja, gdje postoji sumnja da je ta osoba prestala biti nosiocem autorskih prava povodom barem jednog autorskog muzičkog djela ili da više nije registrovana u

BiH, Radno tijelo će obavijestiti osobu u pitanju i tražiti da ta osoba, u razumnom vremenskom intervalu ne kraćem od 7 a ne dužem od 30 dana, dostavi valjan i validan dokaz o statusu nosioca autorskog prava povodom barem jednog autorskog muzičkog djela i povodom registrovanosti u Bosni i Hercegovini.

(4) Radno tijelo će postupiti kao u stavu 3. ovog člana ukoliko bilo koji od dokaza koje je dostavilo pravno lice u pitanju je iz bilo kog razloga prestalo biti valjano ili je utvrđeno da nije bilo valjano kada je dostavljeno Udruženju po bilo kojoj osnovi.

(5) Radno tijelo će postupiti kao u stavu 3. ovog člana ukoliko postoji po bilo kojoj osnovi opravdana sumnja u valjanost bilo kojeg od dostavljenih dokaza pravne osobe povodom činjenica na osnovu kojih je pravna osoba u pitanju pristupila redovnom članstvu Udruženja, ili ako druga osoba predoči Radnom tijelu dokaze kojim se dokazi koje je pravna osoba dostavila dovode u pitanje ili ako Radno tijelo sazna po bilo kojoj osnovi i na bilo koji način nešto što stavlja u pitanje kvalifikovanost za redovno članstvo Udruženja pravne osobe u pitanju.

(6) Redovni član Udruženja koji dobije dopis od Radnog tijela u kom se traži dostavljanje dokaza o dozvoljenosti stalnog boravka u BiH ima obavezu iz članstva u Udruženju kao što je prethodno obrazloženo i uređeno ovim pravilnikom da postupi po nalogu Radnog tijela.

(7) Radno tijelo će obavijestiti Upravni odbor Udruženja o svakom redovnom članu koji u ostavljenom roku nije dostavio valjan i validan traženi dokaz a imalo je obavezu to da učini niti je opravdalo svoje nedostavljanje, na dalje postupanje od strane Upravnog odbora Udruženja.

### Član 7.

(1) Radno tijelo za reviziju članstva Udruženja ima pravo i obavezu da utvrdi da svaki redovni član Udruženja je ili autorom i/ili koautorom i/ili nosiocem autorskog prava povodom barem jednog autorskog muzičkog djela.

(2) Radno tijelo će utvrditi činjenicu iz prvog stava ovog člana tako što će provjeriti da li svaki redovni član Udruženja ima prijavljeno barem jedno autorsko muzičko djelo na kojem je isti označen kao ili autor i/ili koautor i/ili nosilac autorskog prava sukladno pravilniku koji uređuje prijavljivanje autorskih muzičkih djela Udruženju i sukladno pravilniku koji uređuje pristupanje redovnom članstvu Udruženja.

(3) Za svakog redovnog člana Udruženja koji nema prijavljeno niti jedno autorsko muzičko djelo kojem je ili autor i/ili koautor i/ili nosilac autorskog prava povodom tog autorskog muzičkog djela, ako je po bilo kojoj osnovi invalidirana prijava tog/svih autorskih muzičkih djela odnosno na bilo koji način utvrđeno da su upitne prijave autorskih muzičkih djela do te mjere da takva osoba potencijalno nije utvrdila da je ili autorom i/ili koautorom i/ili nosiocem autorskog prava povodom barem jednog autorskog muzičkog djela Radno tijelo će obavijestiti osobu u pitanju i tražiti da ta osoba, u razumnom vremenskom intervalu ne kraćem od 7 a ne dužem od 30 dana, uspješno prijavi Udruženju najmanje jedno a poželjno što više autorskih muzičkih djela kojima je ili autor i/ili koautor i/ili nosilac autorskog prava.

(4) Radno tijelo će na isti način postupiti kao u stavu 3. ovog člana ukoliko je osoba pristupila redovnom članstvu Udruženja na osnovu prijave jednog, dva ili tri autorska muzička djela kojima je ili autor i/ili koautor i/ili nosilac autorskog prava povodom, a gdje je iz bilo kog razloga promjenjena prijava, povučena prijava ili na drugi način ispravljena greška u prijavi autorskog muzičkog djela tako da osoba u pitanju više nije označena kao ili autor i/ili koautor i/ili nosilac autorskog prava povodom tog autorskog muzičkog djela ili su prijave po bilo kojoj osnovi upitne.

(5) Radno tijelo će na isti način postupiti kao u stavu 3. ovog člana ukoliko postoji opravdana sumnja po bilo kojoj osnovi u validnost i valjanost prijave autorskog muzičkog djela kojem je naznačena osoba u pitanju kao ili autor i/ili koautor i/ili nosilac autorskog prava povodom autorskog muzičkog djela povodom činjenice da li je ta osoba ili autor i/ili koautor i/ili nosilac autorskog prava povodom tog autorskog muzičkog djela, ako bilo koja druga osoba predoči Radnom tijelu dokaze kojim se dovodi u pitanje autorstvo redovnog člana čije članstvo se revidira, ako Radno tijelo sazna po bilo kojoj osnovi i na bilo koji način nešto što stavlja u pitanje kvalifikovanost za redovno članstvo Udruženja usljed nedostatka ili autorstva i/ili koautorstva i/ili statusa nosioca autorskog prava povodom autorskog muzičkog djela u pitanju, ako Radnom tijelu bilo koja osoba optuži bilo kog redovnog člana Udruženja za plagijatstvo ili drugu povredu autorskog prava koja dovodi u pitanje autorstvo i kvalifikovanost za redovno članstvo u Udruženju osobe u pitanju.

(6) Redovni član Udruženja koji dobije dopis od Radnog tijela u kojem se traži dostavljanje uredne valjane i validne prijave barem jednog autorskog muzičkog djela u kojem je ta osoba ili autor i/ili koautor i/ili nosilac autorskog prava povodom autorskog muzičkog djela ima obavezu iz članstva kao što je prethodno obrazloženo i uređeno ovim pravilnikom da postupi po nalogu Radnog tijela.

(7) Radno tijelo će obavijestiti Upravni odbor Udruženja o svakom redovnom članu koji nema prijavljeno niti jedno autorsko muzičko djelo za koje je naznačen taj član kao ili autor i/ili koautor i/ili nosilac autorskog prava, koje ima upitne prijave autorskog muzičkog djela za koje je naznačen taj član kao ili autor i/ili koautor i/ili nosilac autorskog prava povodom tog autorskog djela sa neizvjesnosti bilo koje vrste a koja osoba nije postupila po nalogu Radnog tijela u ostavljenom roku, na dalje postupanje.

(8) Odredbe ovog člana povodom autorstva se na analogan način primjenjuju i na dokazivanje statusa nosioca autorskog prava povodom autorskog muzičkog djela pravnih osoba redovnih članova Udruženja.

#### Član 8.

(1) Radno tijelo za reviziju članstva Udruženja ima pravo i obavezu da utvrdi da svaki redovni član Udruženja koji je prijavio jedno, dva ili tri autorska muzička djela te potencijalno i više autorskih muzičkih djela je zaista ili autorom i/ili koautorom i/ili nosiocem autorskog prava povodom barem jednog od tih prijavljenih autorskih muzičkih djela.

(2) Radno tijelo će utvrditi činjenicu iz prvog stava ovog člana tako što će provjeriti da li svaki redovni član Udruženja koji ima prijavljeno, u početku, jedno, dva ili tri autorska muzička djela a kasnije više autorskih djela kao ili autor i/ili koautor i/ili nosilac autorskog prava povodom tih konkretnih autorskih muzičkih djela je dostavio Udruženju validan i valjan dokaz autorstva za barem jedan a najbolje sva ta autorska djela za koje je prijavljena ta osoba kao ili autor i/ili koautor i/ili nosilac autorskog prava sukladno pravilniku koji uređuje prijavljivanje autorskih muzičkih djela Udruženju i sukladno pravilniku koji uređuje pristupanje redovnom članstvu Udruženja.

(3) Za svakog redovnog člana Udruženja koji ima prijavljeno jedno, dva ili tri autorska muzička djela ili, subsekventno, više autorskih muzičkih djela, za koja je naznačen kao ili autor i/ili koautor i/ili nosilac autorskog prava a nije dostavio validan i valjan dokaz autorstva sukladno relevantnim pravilnicima Udruženja povodom barem jednog autorskog muzičkog djela Radno tijelo će obavijestiti osobu u pitanju i tražiti da ta osoba, u razumnom vremenskom intervalu ne kraćem od 7 a ne dužem od 30 dana, dostavi dokaz autorstva povodom barem jednog autorskog muzičkog djela sukladno relevantnim pravilnicima ili da nanovo prijavi drugo autorsko muzičko djelo povodom kojeg je ili autor i/ili koautor i/ili nosilac autorskog prava a što može i dokazati na primjeren način.

(4) Radno tijelo će na isti način postupiti kao u stavu 3. ovog člana povodom svakog redovnog člana koji ima prijavljen bilo koji broj autorskih muzičkih djela kao da je ili autor i/ili koautor i/ili nosilac autorskog prava ukoliko postoji opravdana sumnja ili Radno tijelo bude obavješteno o činjenicama koje stavljaju u sumnju ili autorstvo i/ili koautorstvo i/ili status nosioca autorskog prava za tu osobu u mjeri da je upitno da li je osoba u pitanju ili autor i/ili koautor i/ili nosilac autorskog prava povodom barem jednog autorskog muzičkog djela.

(5) Radno tijelo će na isti način postupiti kao u stavu 3. ovog člana ukoliko bilo koja osoba na bilo koji način obavjesti Radno tijelo da postoji sumnja u ili autorstvo i/ili koautorstvo i/ili status nosioca autorskog prava autorskih muzičkih djela koje je ta osoba prijavila u tolikoj mjeri da postoji sumnja da li je ta osoba ili autorom i/ili koautorom i/ili nosiocem autorskog prava povodom barem jednog autorskog muzičkog djela.

(6) Redovni član Udruženja koji dobije dopis od Radnog tijela u kojem se traži dostavljanje validnog i važećeg dokaza za autorstvo na barem jednom autorskom muzičkom djelu ima obavezu iz članstva kao što je prethodno obrazloženo i uređeno ovim pravilnikom da postupi po nalogu Radnog tijela.

(7) Radno tijelo će obavijestiti Upravni odbor Udruženja o svakom redovnom članu koji nema prijavljeno niti jedno autorsko muzičko djelo za koje je naznačen taj član kao ili autor i/ili koautor i/ili nosilac autorskog prava na autorskom muzičkom djelu, koje ima upitne prijave autorskog muzičkog djela za koje je naznačen taj član kao ili autor i/ili koautor i/ili nosilac autorskog prava povodom tog autorskog djela sa neizvjesnosti bilo koje vrste a koja osoba nije postupila po nalogu Radnog tijela u ostavljenom roku na dalje postupanje.

(8) Odredbe ovog člana povodom autorstva se analogno odnose i na dokazivanje statusa nosioca autorskog prava povodom autorskog muzičkog djela pravne osobe redovnog člana Udruženja.

#### Član 9.

(1) Kako, sukladno odredbi člana 2 st. 3 ZKOAISP-a Udruženje može kolektivno ostvarivati autorska muzička prava samo povodom objavljenih autorskih muzičkih djela, Radno tijelo za reviziju članstva Udruženja ima pravo i obavezu da utvrdi da svaki redovni član Udruženja je ili autorom i/ili koautorom i/ili nosiocem autorskog prava povodom barem jednog objavljenog autorskog muzičkog djela.

(2) Radno tijelo će utvrditi činjenicu iz prvog stava ovog člana tako što će provjeriti da li svaki redovni član Udruženja ima prijavljeno barem jedno autorsko muzičko djelo na kojem je isti označen kao ili autor i/ili

koautor i/ili nosilac autorskog prava a koje je objavljeno sukladno članu 2. ZAISP-a a što se dokazuje sukladno pravilniku koji uređuje prijavljivanje autorskih muzičkih djela Udruženju.

(3) Za svakog redovnog člana Udruženja koji nema prijavljeno niti jedno objavljeno autorsko muzičko djelo kojem je ili autor i/ili koautor i/ili nosilac autorskog prava povodom tog autorskog muzičkog djela, kao i radne članove gdje postoji neizvjesnost da li su njihova autorska muzička djela objavljena, Radno tijelo će obavijestiti osobu u pitanju i tražiti da ta osoba, u razumnom vremenskom intervalu ne kraćem od 7 a ne dužem od 30 dana, dostavi validan i valjan dokaz da je prijavljeno autorsko muzičko djelo u pitanju objavljeno sukladno relevantnom pravilniku ili da uspješno prijavi barem jedno autorsko muzičko djelo povodom kojeg je ili autor i/ili koautor i/ili nosilac autorskog prava koje jeste objavljeno.

(4) Radno tijelo će na isti način postupiti kao u stavu 3. ovog člana ukoliko je osoba pristupila redovnom članstvu Udruženja na osnovu prijave jednog, dva ili tri autorska muzička djela kojima je ili autor i/ili koautor i/ili nosilac autorskog prava povodom autorskog muzičkog djela.

(5) Radno tijelo će na isti način postupiti kao u stavu 3. ovog člana ukoliko postoji opravdana sumnja po bilo kojoj osnovi da li je bilo koje prijavljeno autorsko muzičko djelo bilo kojeg redovnog člana Udruženja objavljeno.

(6) Redovni član Udruženja koji dobije dopis od Radnog tijela u kojem se traži dostavljanje validnog i valjanog dokaza o objavljenosti autorskog muzičkog djela koje je prijavljeno kao da je istom ta osoba ili autor i/ili koautor i/ili nosilac autorskog prava ima obavezu iz članstva kao što je prethodno obrazloženo i uređeno ovim pravilnikom da postupi po nalogu Radnog tijela.

(7) Radno tijelo će obavijestiti Upravni odbor Udruženja o svakom redovnom članu koji nema prijavljeno niti jedno objavljeno autorsko muzičko djelo za koje je naznačen taj član kao ili autor i/ili koautor i/ili nosilac autorskog prava na autorskom muzičkom djelu dalje na postupanje.

(8) Povodom autorskih muzičkih djela koje jesu prijavljene Udruženju ali za koje Radno tijelo utvrdi da nisu objavljene u relevantnom zakonskom smislu, Radno tijelo će obavijestiti Stručnu službu Udruženja na dalje postupanje.

#### Član 10.

(1) Radno tijelo za reviziju članstva Udruženja će razmotriti svaki podnesak redovnog člana povodom bilo kojih od dopisa koje je Radno tijelo uputilo redovnom članu u okviru svojih nadležnosti i ovlaštenja.

(2) Radno tijelo nema obavezu da prihvati ili odbije dostavljeni dokaz prima facie, već vrši analizu i provjeru svakog dostavljenog dokaza individualno i svih dostavljenih dokaza kolektivno.

(3) Radno tijelo vrši procjenu svakog pojedinog dokaza i svih dokaza kao cjeline te odlučuje da li dostavljeni dokazi su prihvatljivi u smislu da upućuju na zaključak da zaista postoji činjenica koja se njima dokazuje ili dostavljeni dokazi nisu prihvatljivi, u kom slučaju Radno tijelo odlukom mora da obrazloži zašto dostavljeni dokazi nisu prihvatljivi.

(4) Radno tijelo će razmotriti da li dostavljeni dokaz je u skladu sa relevantnim pozitivnim pravnim pravilima, sa Statutom Udruženja, sa opštim pravilima Udruženja sa pravilnikom kojim se uređuje postupak prijavljivanja autorskih muzičkih djela te pravilnikom kojim se uređuje postupak pristupanja redovnom članstvu udruženju kao i da li je po slobodnoj ocjeni većine članova Radnog tijela dokaz prihvatljiv i ubjedljiv.

(5) Radno tijelo će razmotriti sve dostavljene dokaze nepristrasno i nezavisno, u skladu sa svojim kvalitetima uvažених muzičkih stvaralaca i poštovanih članova Udruženja, sukladno vlastitom nahodjenju i razumjevanju te slobodnoj ocjeni.

(6) Nijedan član Radnog tijela neće odgovarati organima Udruženja za svoju odluku o prihvatljivosti dostavljenog dokaza.

(7) Radno tijelo nije vezano dokazima koje redovni član dostavi Radnom tijelu te može odbiti sve dostavljene dokaze, može odbiti neke ili samo pojedine dokaze. Radno tijelo ima obavezu da pisano obrazloži razloge za odbijanje dostavljenih dokaza. Radno tijelo ima obavezu da pisano obrazloži prihvatanje dostavljenih dokaza samo ako to od njih pisano traže organi Udruženja ili pojedini član Udruženja sa pravnim interesom.

(8) Radno tijelo će dopisom obavijestiti individualnog redovnog člana koji je dostavio tražene dokaze o prihvatanju dokaza ukoliko Radno tijelo donese odluku da redovni član u pitanju zadovoljava sve uslove za redovno članstvo u Udruženju.

(9) Ukoliko Radno tijelo utvrdi da jedan ili više redovnih članova ne zadovoljavaju jedan ili više uslova za redovno članstvo u Udruženju odnosno ukoliko ne prihvate jedan ili više dostavljenih dokaza o toj činjenici će Radno tijelo obavijestiti individualnog redovnog člana koji je dostavio dokaze u pitanju odnosno na kojeg se

dokazi u pitanju odnose kao i Upravni odbor Udruženja tako što će dopisom obrazložiti konkretni nedostatak o uslovu za redovno članstvo u Udruženju, razloge za odbijanje dostavljenog dokaza kao i cjelokupni spis tog člana sa svim prijavama autorskih muzički djela tog člana, ukoliko ih ima, te svom eventualnom korespondencijom i drugim relevantnim dokumentima.

(10) Radno tijelo ima pravo i dužnost da obavijesti Skupštinu Udruženja o rezultatima svog rada povodom individualnih revizija redovnog članstva Udruženja ukoliko to traži Skupština Udruženja, Upravni odbor Udruženja, Nadzorni odbor Udruženja ili Generalni direktor Stručne službe Udruženja.

(11) Radno tijelo će odlukom detaljnije urediti postupak obavještanja organa Udruženja kao i procesne aspekte svog djelovanja u granicama nadležnosti i ovlaštenja Radnog tijela.

#### Član 11.

Ovaj pravilnik stupa na snagu danom donošenja a početi će se primjenjivati mjesec dana nakon stupanja na snagu.

Broj: P-03/20  
Sarajevo, 18.06.2020. godine

Predsjednik Skupštine AMUS-a

David Sučić

